

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

August 2014

von Helen Alba

## Nit um die Welt

De Vetter Martin is zwar fleißich un gutwillich, doch eigensinnich un dickkeppich bis dortenaus. Er kummt nit mit dere neimodisch Zeit mit un hängt sei Glick an alles Aldi un längscht Vergangeni. Un somit hat er e phaar Grundsätz, vun dene er nit um die Welt abwaiche tut. Natierlich hat sei Bäsl Lentschi alles versucht, ne mol hie un do umzustimme, was ihre bisher nie gelung is.

Es sin doch jetz die heisse Summertäch. Jede Morjet kriet de Vetter Martin ingschärft: „Ich weeß, du willscht wieder fugeije. Doch laaf der die Sohle bis geger elf Uhr ab un kumm hem, wann die Sunn anfangt Bloodre zu brenne! Herrscht, was ich saa?“ Er schnappt zwar mitm Kopp un geht sei Wecher. Doch hem kummt er nit só schnell. Un wann er dann endlich zu Mittach gess hat, huckt er sich in de Sessl for ausruhe. Die Bäsl Lentschi tät jo die Better abrahme, dass er sich wenschtens e Stund anständig ausruht. Doch so was is tabu. Weil wer geht am helllichte Tach ins Bett? Liewer losst er de Kopp mol rechts, mol links bamble, losst ne iwerm Gumme vorfalle – des is ke Geruhs.

Un es zweiti Problem, wu jede Tach ansteht, des is es Rumziehe. Es kummt doch vor, dass mer nit immer in der Alltachsmontur rumlaafe kann. Un immer is Krutzekriech, wanns heescht: „Du muscht e anri Hose anziehe un es Himit is ach for in die Wäsch!“ Dann spautzt de Vetter Martin rum, weil ihm die Werkdachshose gut genuch is un es Himit sich beim ville Wäsche amend verfransle tut.

Un wann gsaat git, dass was Neijes angeschafft gin muss, egal obs vun eem Tischtuch, Bettzeich oder Gscherr die Red is. Do muss die Bäsl Lentschi ihre Mann wuchelang druf vorbereite, bis se ne dermit „iwerrasche“ kann. Ganz schlimm gits, wann neijes Gwand angeschafft gin soll. „Die Schänk sin doch zum Berschte angfillt. Ich han Gwand genuch, solange ich leb!“, wettet de Vetter Martin. „Du muscht awer doch de Leit gleiche. Un des tuscht nit mit deine Fetze vun vor villi Johre. Jetz is anri Modi Mann. Die Hose un Jänkl sin annerschter, vun de Himiter gar nit zu rede. In deine uralte Klamotte kummscht kindisch derher un es kummt mer gar nit, dich so schwächich ausm Haus gehn zu losse!“ Wann dann mit aller Gewalt doch was angeschafft werd, dauerts immer noch sei Zeit, bis de Vetter Martin des „Zeich, wu ke Hinnerscht un ke Vorderscht“ hat anziehe tut. Un mit seiner aldi Schnepskapp laaft er immer noch rum, obzwar derweil schun seit zwaa Wintre e neiji am Zappebrett hängt. „Die kann mer gstohl bleiwe“, so behaupt er jedesmol.